



O presidente acusa a oposición de "apropiarse da dor" dos afectados.

Feijoo advirte de que os protagonistas da protesta no parlamento poden acabar nos tribunais por irromper a sesión do pleno.

O presidente ten o convencemento de que as persoas que protestaron no parlamento non son "representativas" da maior parte "das que sufriron as preferentes".

Nun dos pouco abondosos exercicios de transparencia aos que acostuma o sector, Novagalicia Banco admitiu hai meses que a súa primeira emisión se remonta ao ano 2003 e que continuaron a ser colocadas entre a clientela ata 2011, isto é, ata o ano no que a entidade bancaria se viu na imposibilidade de mantelo pola súa precaria situación económica. O controvertido produto financeiro ten o seu sustento normativo [nunha lei impulsada ese mesmo ano polo Goberno central nas Cortes Xerais](#)

, dominadas con maioría absoluta polo PP de José María Aznar. A xénese das preferentes foi obviada de novo este xoves polo presidente da Xunta, Alberto Núñez Feijóo, que na súa primeira intervención pública tras as

[intensas protestas no Parlamento dos afectados pola "estafa"](#)

, apostou por distribuír culpas entre o resto de grupos políticos non só polos incidentes na Cámara, que tamén, senón polas propias preferentes.

Ao remate da xuntanza semanal do Consello da Xunta Feijóo expresou a agardable censura á interrupción do pleno, pero non ficou aí. "Os insultos e as ameazas están fóra de lugar en calquera sitio, moito menos nun Parlamento", evidencia, para despois asegurar non coñecer "ningún precedente como o de onte", "onde os deputados vitoreen e aplaudan aos que insultan

e ameazan". Ao líder conservador parécelle "gravísimo" porque, ao seu xuízo, os xestos de ánimo lanzados por PSdeG, AGE e BNG cara aos afectados -algúns parlamentarios e parlamentarias mesmo acudiron a tentar calmar a tensa situación- só tiñan a intención de "querer apropiarse da dor de quen o está pasando mal na cuestión dos seu activos financeiros".

▣ **As preferentes teñen sustento normativo nunha lei impulsada por Aznar en 2003, cando Feijóo xa formaba parte do Goberno galego**

"É grave a actitude dos convidadso pero é inxustificable ver a deputados que aplauden ameazas graves" porque eles, asegura, "son os mesmos que lavaron as mans cando gobernaban os seus grupos e os seus gobernos aceptaron este tipo de produtos financeiros", di, adxudicándolles a socialistas e nacionalistas -é de supoñer que non a AGE, que non participou en goberno ningún- a responsabilidade en exclusiva da existencia e pervivencia das preferentes. Ao tempo Feijóo esfórzase en situar á Xunta do lado bo e faino en forma de advertencia ás persoas estafadas: "non esquezan onde están os seus aliados" xa que estes "non son os que gobernaban cando se comercializaban as preferentes, insiste -Feijóo foi membro do Goberno galego, primeiro como conselleiro e vicepresidente (entre 2003 e 2005) e despois como presidente (dende 2009) durante case sete anos nos que circularon as preferentes-".

"Os afectados polas preferentes seguen tendo todo o compromiso da Xunta e seguen formando parte dunha das principais preocupacións do Goberno galego", que seguirá pulando pola arbitrase, asegura. Non obstante, e dende o convencemento de que as persoas que acudiron ao Parlamento non son "representativas" da maior parte "das que sufriron as preferentes", o presidente amósase igual de convencido de que o Parlamento "terá que estudar as actitudes e visionar os vídeos que lamentablemente están rexistrados". Unha vez realizada esa revisión a Presidencia da Cámara "terá que actuar en consideración co Regulmaento e co ordenamento xurídico vixente", o que pode implicar dende vetarlles a entrada no Pazo do Hórreo aos protagonistas da protesta ata levalos ante os tribunais por interromperen a sesión plenaria.

Escoitar audio da intervención en [PRAZA](#)